

NIIBI!

KNIV! ERNA OSLAND • SÁMEGILLII: INGER MARIE OSKAL

HKKU SON MEARRIDA. Seavdnjadasas savkala alces ahte dás duohko áigu son ieš birget. Ihttin ii dárbbáš ballat.

Ovdal go nahkárat rohttejit, jurddaša son dárkilit mo áigu dahkat. Mo son áigu bissehit sin.

Go sii čuoččahit su ovdii, nu go lávejit, áigu son čuožžut áibbas jaska. Ja de – de besset suorganit – áigu son rohttet niibbi.

Go son han dárbbáša niibbi! Dakkára mii lea stuoris ja bastil. Stuorámusa mii viesus gávdno. Dan maid áhčči láve atnit mielde meahcis. Dan mii lea nu bastil ahte álo galgá leat dohpa siste. Ja nu bastil ahte son ii goasse beasa dan atnit, dat lea dušše mielde – láve áhčči dadjat – jus mihkke dáhpáhuvvá.

Dál *galgá* juoga dáhpáhuvvat!

Ja de son dárbbáša niibbi.

Imaš go dan ii leat ovdal fuomášan!

Go áhčči boktá su iđđes, de lihkká ovttatmano.

– Vuoi gea die! imaštallá áhčči, go dábálaččat fanada son guhká ovdal go lihkká. Veallá nu guhká go sáhhtá.

Muhto ii odne.

Odne son lihkká dakkaviđe, manná njuolga basadanlatnjii. Ja go áhčči ges manná dohko, de ohcala son niibbi.

Man lossat dat lea! Mihá losit go son muitá.

Son gaikkiha dan olggos dohpas.

Ja nu bastil!

Son guoskkaha dan, dovdá stáli lea galmmas, ja ahte ieš oadju.

Dál galgá buot rievdat. Buot galgá šaddat buorre, jurddaša son ja coggala niibbi sehkki. Son ii bala šat, ii veaháge. Ii ge son bala šat mannamis skuvlii. Son lea oadjebas ja gievra. Gearggus!

Nu go dábálaččat čuovvu son áhči biilla mielde ovttá gaskka.

– Buorre skuvlabeaivi! čurve áhčči ovdal go son šloaŋkala uvssa gitta. Son moddjá áhččái. Dát beaivi *šaddá* buorre. Áibbas earalágan go eará beaivvit, dat lea sihkar. Go sus lea niibi ja lea gearggus.

Son doapmala. Vázzá johtileappot go láve.

Dábálaččat láve váruhit ahte *ii* vácce johtilit. Son ii ábut ollet árrat, go de šaddá áigi guhkki ovttas *singuin*.

Muhto odne – odne vázzá johtilit. Seahkká šlivgasaddá sealggis. Ja niibi.

Juo, son lea gearggus!

Bidjala vel eambo leahtu.

Son lea vuosttažin skuvlašiljus. Vuosttaš geardde lea *son* vuordime *sin*. Muhto eai sii fuomáš dan, go sii eai oainne niibbi. Sii oidnet dušše su ja nu go dábálaččat birastahttet sii su.

Sii geigejit giedaid. Čužžot das geiggo giedaid ja vurdet ahte son deavdá daid. Vurdet ruđaid, háliidit báberuđaid. Muhto dohkkehit maiddái logežiid ja guoktelogežiid.

– Ruđaid!

Son ii vástit. Son čuožžu jaska ja jurddaša niibbi birra.

– Ruđaid! garadit sii. Garraseappot dán háve. Sii eai dieđe mii su seahkas lea, girjiid duohken, sealggi vuostá.

Sii bohtet gitta njuni vuollái.

– Ruđaid, it go gula?

Son nuolasta seahka.

Maid don ájahalat? Jerret sii ja čievččastit su seahka.

Son guvdnje. Dál lea áigi dievvan. Dál ožžot váruhit! Son rabesta seahka ja coggala gieđa dohko.

Juo, dat lea doppe. Galmmas ja bastil.

Lossat ja bastil ja dušše vuordá beassat bissehit daid geaiggo gieđaid ja julggiid mat čikčet.

– Doama!

Ovdal go háhppaha rohttet niibbi, dovdá son gieđa iežas lummas, ja ferte luoitilit dan. Muhto ii olle dohppet ruovttoluotta kinokoartta man lei áhčis ožžon ikte.

Ii, son ii háliit čierrut. Ii odne. Odne lea sus niibi. Niibi mii lea bastil ja galgá oažžut buot váivviid nohkat.

Son čárvu niibbi go oaidná koartta jávkkiheame muhtima lummii. Maid galgá son áhččái dadjat? Ahte lea lámppán dan? Dan maid?

– Ihttin buvttát ruđaid!

Son nivkala.

– Nu go dábálaččat, lohket sii ja hoigadastet su.

Son nivkala fas. Son ferte, go dan sii gáibidit. Sii vurdet ahte son nivkala, ii ge vástit. *Sii* galget hoigadastit, ja *son* galgá nivkalit.

Son ii galgga goasse jietnadit maide. Ii *sidjiide*, ii sin *birra*. Ja go bohtet luohkkálatnjii, de ii galgga son jietnadit maidege sin geaiggo gieđaid birra. Nu lea soahpamuš.

– Eambo go dábálaččat, lohket sii.

Sii hoiggadit su.

Son nivkala. Son nivkkuha hirbmosit. Son guoskkaha niibbi ja diehtá ahte ihttin *ferte* buktit ruđa. Eambo go dábálaččat.

BARGOBIHTÁT

1. Niibi lea mihtilmas novealla ja dasa sáhtta geavahit dán málle: <https://calliidlagadus.org/do/%c5%a1%c3%a1%c5%8b%c5%8ber---novealla.html>
Ságastehket áinnas čiekŋaleappot motiivva, fáttá ja sága.
2. Makkár mobbenvuogi oaidnit mii dás?
Ságastallan ceahkis.
3. Lehpet go goasse vásihan áitagiid?
Makkáriid?
Ságastallan ceahkis.
4. Dramatiserejehket novealla.
Makkár dovdu lei váldopersovnnas?
Naba «sis»?
Ságastallan ceahkis.